

10. maj 2017

Meeqqat inuusuttuaqqallu 18-t inorlugit ukiullit ikiaroonartumik atuilersimasut katsorsartinnissaannik immikkut ittumik neqeroorsinnaanissamik Naalackersuisut UKA 2018-mut pilersaarusiornissaannik Inatsisartut aalajangiiffigisassaattut siunnersuut.

Bendt B. Kristiansen Inuit Ataqtigiit siunnersuutaanut Siumumiit qujavugut. Imatullu oqaaseqarfigissavarput.

Akuersarneqarsinnaangilaq nunatta siunissaannik taajukkagut ikiaroonartumik Hash-mik taamak annertutigisumik atuilersimammata. Ajorsarnertut taaneqarsinnaavoq inuiaqatigiinni taamak killiffeqarsimagutta. ”Meeqqat siunissaraagut” partiit akimorlugit ataatsimoorfigissallugu pissutissaqarluarpugut. Taamaattumik Siumumiit akiuiniarneq annertunerusoq, periusissiornerlu sakkortunerusoq ilaqutaasunullu sunniuteqarnerusoq assut tapersorsorparput.

”Naalackersuisooqatigiit isumaqarput innuttaaqataasoq kinaluunniit pisussaasoq ilaqtaminut, qanigisaminut nunaqqatiminullu inooqataanermini timikkut tarnikkullu inuunerup atoruminartuunissaanut suleqataanikkut akisussaaqataasoq.”¹ Uani aamma pineqarput meeqqat. Meeqqat avatangiisiminnit kinaassusilersorneqartarput. Imminnullu ulorialitsitsissutaasinnaasumik iliortalersimappata angajoqqaat inersimasullu allat uagut pisussaafigaarput tamatumingga akiuinissamut iliuuseqassalluta.

Namminersorlutik Oqartussat nalunaarutaat nr. 4, 14. februar 2005-meersoq §7, Imm.2 naapertorlugu immikkut suliniuteqarnissamik pisariaqartitsisoqarnerusoq najukkami suliaasaqarfiit akimorlugit angajoqqaat, ilinniartitsisut, perorsaasut, kigutit nakorsaallu suleqatigalugit najukkami peqqinnissamik sullissisunit nalilerneqassaaq. Isumaginninnermut, perorsaanermut kiisalu peqqinnissamut tunngasuni ilisimasalittut oqartussat pisariaqartillugu naliliinermi peqataatinneqarsinnaapput.

Meeqqat inuusuttunillu ikiorsiisarneq pillugu Inatsisartut peqqussutaat nr. 1, 15. April 2003-meersoq § 6, imm. 3 naapertorlugu Meeqqap peqqissusaata ineriartornerataluunniit annertuumik ajoquserneqarnissaa navianartorsiornerusoq paasiniarlugu misissuinissaq pisariaqarpat angajoqqaatut oqartussaassuseqartoq meerarlu 15-leereersimasoq akuersiteqqaanngikkaluarlugit kommunalbestyrelsip misissuinissaq aalajangiussinnaavaa.

Taamaakkaluartoq malunnarpoq suli pisariaqartitsineq annertunerusoq, periuusissallu ersarinnerusut timalernissai amigaatigineqartut. Uani susassaqarfiit akimorlugit una ajornartorsiut ataatsimoorfigalugu suleqatigiiffigineqartariaqarpoq. Meerartagunuku pineqartut taamaattumik ernumissamut pissutissaqarput.

¹ Naalackersuisooqatigiinnissamut isumaqatigiissut, qupp. 21



Maani inersuarmi oqallinnerput oqaasiinaassanngippat susassaqrarfiit akimorlugit suleqatigiinnissaq pisariaqarpoq. Naak meeqqanut inatsisissaq nutaaq massakkut aallartinnissaa qilanaarigaluaripput, taamaattoq uuma siunnersuutip allatut isigaluta iliuseqarnissamik takunnilersippaatigut.

Taamaattumik siunnersuuteqartutuulli meeqqat ikiaroonartumik hashimik atuilersimappata kommune atuarfeqarfiillu suleqatigalugit piartumik katsorsaasarnissamik pilersaarusiortoqartari-aqartoq isumaqarpugut. Naalakkersuisut akissuteqaamminni ersarissaatigaat “stepped care” malillugu meeqqanut inuusuttunullu katsorsartinnissamik pisariaqartitsisunut neqeroorut taanna atorlugu ikiorseqarsinnaassasut. Unalu periuseq uagut inuiaat suli ilisimanninnatsigu Naalakkersuisunut kaammattuutigissavarput qaammarsaaneq tassunga tunngatillugu annertusaqqullugu.

Nalunngilarput aanngajaarniutinik kikkugalulluunniit atuilersinnaasut. Imaangilaq inuttut atugarliortut kisiisa eqqugaasartut, kisianni meeqqat inuusuttullu imminnut sunnersinnaasarput, taamaasilluni ilaatigut ilaqutariit atugarissaaraluit aamma eqqugaasinnaasarput.

Taamaattumik tassungarpiaq tunngatillugu Naalakkersuisut suli suliniutissatut pisariaqartitat pillugit suleqatigiinnermik aallartittoqannginnera pillugu piaartumik siunnersuuteqartup kissaataa malillugu UKA2018 Naalakkersuisut pilersaarusiamik saqqummiussinissaannik kaammattoruvavagut.

Taamatut oqaaseqarluta ataatsimiitsitaliamut susassaqartumut ingerlaqqinnissaa kissaatigaarput. Siumumiillu ataatsimiititaliap sulilluarnissaannik kissaassilluta qujavugut.

Laura Táunâjik

Siumut